

SEGAN JAWA
JAVAN FROGMOUTH

FAMILI: Batrachostomidae
NAMA SAINTIFIK: *Batrachostomus javensis*

CIRI-CIRI

Individu dewasa sub-spesies *B.j.continentalis* mempunyai bahagian atas badan berwarna coklat, bintik berwarna kuning pucat, skapular berwarna hitam dan putih dengan tompok putih dan kolar halus berwarna hitam dan putih. Bahagian bawah badan berwarna putih kekuningan dengan tanda putih pada dada dan perut. Matanya pula berwarna kuning. Sub-spesies *B.j.affinis* yang terdapat di selatan Thailand pula mempunyai tekak dan dada yang kurang kemerahan, mempunyai tanda hitam pada bahagian atas badan dan bawah dan jalur melintang pada ekor. Individu betina mempunyai warna coklat kemerahan gelap dengan kolar hitam dan putih, tanda putih yang besar pada skapular dan ekor yang berjalur. Bagi individu juvenil, dokumentasinya agak kurang. Panjang keseluruhan bagi individu dewasa ialah 23 hingga 24 sm.

TABURAN

Spesies ini merupakan spesies residen di Sumatera, Jawa dan Borneo. Di Asia Tenggara, spesies ini merupakan spesies residen yang jarang ditemui di Tenasserim, Thailand (kecuali bahagian tengah), Semenanjung Malaysia, utara dan selatan Laos dan Cochinchina.

MAKANAN

Dietnya terdiri daripada riang-riang, belalang, rama-rama, kupu-kupu kumbang, semut, anai-anai, serangga-serangga lain dan ulat beluncas.

HABITAT

Habitat yang sesuai bagi spesies ini ialah di hutan dipterokarp, hutan daun luruh bercampur, pinggir hutan dan hutan sekunder sehingga ke ketinggian 800 m dari aras laut.

LOKASI DI MANA IA PERNAH DITEMUI:

Di Semenanjung Malaysia, spesies ini boleh ditemui di Taman Negara.

BUNYI

Individu jantan mengeluarkan bunyi siulan *tee-loo-eee* atau *loo-eee* yang lebih pendek. Ia juga mengeluarkan siri bunyi *KWAH-a* atau *kwaaha* dan nota *whah* atau *gwaa*. Individu betina mengeluarkan bunyi seakan-akan ketawa iaitu *grra-ga-ga-ga* atau *kerr-ker-ker*.

PEMBIAKAN

Musim pembiakan bagi spesies ini adalah di antara bulan Februari hingga Jun. Individu betina boleh menghasilkan satu hingga dua biji telur berwarna putih. Sarangnya kecil, dibina pada dahan yang melintang, 1 hingga 7 m dari aras tanah.